

菩薩本生鬘論卷第一

同卷

右一

聖勇菩薩等造

宋劉敬大本試鴻臚少卿同譯經梵才大德紹德慈詢等奉詔譯

稽首一切智 妙湛圓融德 聖支分相貌

無作同真際 我意靜無諍 忘稱讚布施

右一

以四大為本 白淨生無變 往昔於人中

常修寂靜行 以拘蘇摩華 合掌而奉散

遠離諸罪惡 解脫諸煩惱 為人天愛敬

演說無上道 由意寂靜故 獲得清淨法

世間相常住 無盡無修作 彼世間眾生

聞相應功德 起決定信解 住如來密藏

息運動遷變 滅虛妄顛倒 彼勝智功能

如燈常徧照 是諸有情類 自性本無垢

依止佛世尊 樂修真淨業 謂聞三寶名

及師長教誨 隨順善行學 蠲除我慢意

往昔調御師 勤修菩薩道 依布施愛語

及利行同事 攝取於勝慧 脫染汙繫縛

利樂於有情 增長諸白法 由施力圓滿

生梵天種族 唯增上淨業 而為其根本

若起於我慢 及無勝慧力 於自種類中

而生多慢類	於百千萬種	離生之喜樂
法顛倒取故	彼則不能證	又彼寂靜處
福德最殊勝	具廣大色相	非小因所得
唯捨家出家	彼菩提薩埵	具足大智慧
能堪任荷負	彼於過去世	久修六度行
已斷除障染	為出離後邊	具廣大慈心
憐愍衆生類	彼自性真實	無別染汙因
是時天帝釋	觀察於世間	來驗彼人行
其心無傾動	而作如是言	今此善男子
出現於世間	最為殊勝者	於遷變無常

心安固若是	以淨妙飲食	伸供養恭敬
諸天及世人	咸皆獲善利	憶念修淨因
契無相真智	如是修行者	能治煩惱病
住清淨學處	質直而無偽	觀察勝義諦
離染無修作	啓方便慈門	施平等安樂
發生於勝解	無邪命希求	棄背諸有為
直躋於實際	成就清淨道	相應諸功德
於雜染因緣	畢竟皆除斷	常崇奉恭信
如來祕密藏	離妄執分別	息除於恚惱
隨順勝種族	而生於染習	如影隨其形

如母生於子 菩薩悲願力 愍恤諸群生
 勇猛捐自身 不生憂苦想 我今以微善
 歸命伸稱讚 願眾聖冥加 祈悉地成就
 投身飼虎緣起第一
 爾時世尊將諸大眾詣般遮羅大聚落所至
 一林中謂阿難曰汝於此間爲我敷座佛坐
 其上語諸比丘汝等欲見我往昔時修行苦
 行舍利已不白言願見于時世尊以手按地
 六種震動有七寶塔涌現其前世尊即起作
 禮右旋阿難汝可開此塔戶見七寶函珍奇

間飾阿難汝可復開此函見有舍利白如珂
 雪汝可持此大士骨來世尊受已令眾諦觀
 而說頌曰

菩薩勝功德 勤修六度行 勇猛求菩提
 大捨心無倦

汝等比丘咸伸禮敬此之舍利乃是無量戒
 定慧香之所熏修時會作禮歎未曾有時阿
 難陀白言世尊如來大師出過三界以何因
 緣禮此身骨佛言阿難我因此故得至成佛
 爲報往恩故茲致禮今爲汝等斷除疑惑說

昔因緣志心諦聽阿難乃往過去無量世時
有一國王名曰大車王有三子摩訶波羅摩
訶提婆摩訶薩埵是時大王縱賞山谷三子
皆從至大竹林於中憩息次復前行見有一
虎產生七子已經七日第一王子作如是言
七子圍繞無暇尋食飢渴所逼必噉其子第
二王子聞是說已哀哉此虎將死不久我有
何能而濟彼命第三王子作是思念我今此
身於百千生虛棄敗壞曾無少益云何今日
而不能捨時諸王子作是議已徘徊久之俱

捨而去薩埵王子便作是念當使我身成大
善業於生死海作大舟航若捨此者則棄無
量癰疽惡疾百千怖畏是身唯有便利不淨
筋骨連持甚可厭患是故我今應當棄捨以
求無上究竟涅槃永離憂悲無常苦惱百福
莊嚴成一切智施諸衆生無量法樂是時王
子與大勇猛以悲願力增益其心慮彼二兄
共爲留難請先還宮我當後至爾時王子摩
訶薩埵遽入竹林至其虎所脫去衣服置竹
枝上於彼虎前委身而卧菩薩慈忍虎無能

爲即上高山投身于地虎今羸弱不能食我
即以乾竹刺頸出血于時大地六種震動如
風激水涌沒不安日無精明如羅睺障天雨
衆華及妙香末續紛亂墜徧滿林中虛空諸
天咸共稱讚是時餓虎即舐頸血噉肉皆盡
唯留餘骨時二王子生大愁苦共至虎所不
能自持投身骨上久乃得蘇悲泣懊惱漸捨
而去時王夫人寢高樓上忽於夢中見不祥
事兩乳被割牙齒墮落得三鴿鷄一爲鷹奪
夫人遂覺兩乳流出時有侍女聞外人言求

覓王子今猶未得即入宮中白夫人知聞已
憂惱悲淚盈目即至王所白言大王失我最
小所愛之子王聞是已悲哽而言苦哉今日
失我愛子慰喻夫人汝勿憂感吾今集諸大
臣人民即共出城分散尋覓未久之頃有一
大臣前白王言聞王子在其最小者今猶未
見次第二臣來至王所懊惱啼泣即以王子
捨身之事具白王知王及夫人悲不自勝共
至菩薩捨身之地見其遺骨隨處交橫悶絕
投地都無所知以水徧灑而得惺悟是時夫

人頭髮蓬亂宛轉于地如魚處陸若牛失犢
及王二子悲哀號哭共收菩薩遺身舍利爲
作供養置寶塔中阿難當知此即是彼薩埵
舍利我於爾時雖具煩惱貪瞋癡等能於地
獄餓鬼傍生惡趣之中隨緣救濟令得出離
何況今時煩惱都盡無復餘習五號天人師具
一切智而不能爲一一衆生於險難中代受
衆苦佛告阿難往昔王子摩訶薩埵豈異人
乎今此會中我身是也昔國王者今淨飯父
王是也昔后妃者摩耶夫人是也昔長子者

彌勒也昔次子者文殊是也昔彼虎者今
姨母是也七虎子者大目乾連舍利弗五比
丘是也爾時世尊說是往昔因緣之時無量
阿僧祇人天大衆皆悉悲喜同發阿耨多羅
三藐三菩提心先所涌出七寶妙塔佛攝神
力忽然不現

尸毗王救鴿命緣起第二

佛告諸比丘我念往昔無量阿僧祇劫閻浮
提中有大國王名曰尸毗所都之城號提婆
底地唯沃壤人多豐樂統領八萬四千小國

后妃采女其數二萬太子五百臣佐一萬王
蘊慈行仁恕和平愛念庶民猶如赤子是時
三十三天帝釋天主五衰相貌慮將退墮彼
有近臣毗首天子見是事已白天主言何故
尊儀忽有愁色帝釋謂言吾將逝矣思念世

間佛法已滅諸大菩薩不復出現我心不知
何所歸趣時毗首天復白天主今閻浮提有
尸毗王志固精進樂求佛道當往歸投必脫
是難天帝聞已審爲實不若是菩薩今當試
之乃遣毗首變爲一鴿我化作鷹逐至王所

求彼救護可驗其誠毗首白言今於菩薩正
應供養不宜加苦無以難事而逼惱也時天
帝釋而說偈曰

我本非惡意 如火試真金 以此驗菩薩
知爲真實不

說是偈已毗首天子化爲一鴿六帝釋作鷹急
逐於後將爲搏取鴿甚惶怖飛王腋下求藏
避處鷹立王前乃作人語今此鴿者是我之
食我甚饑急願王見還王曰吾本捨願當度
一切鴿來依投終不與汝鷹言大王今者愛

念一切若斷我食命亦不濟王曰若與餘肉
汝能食不鷹言唯新血肉我乃食之王自念
言害一救一於理不然唯以我身可能代彼
其餘有命皆自保存即取利刀自割股肉持
用與鷹賀此鵠命鷹言王爲施主今以身肉
代於鵠者可稱令足王勅取稱兩頭施盤挂
鉤中央使其均等鵠之與肉各置一處股肉
割盡鵠身尚低以至臂脇身肉都無比其鵠
形輕猶未等王自舉身欲上稱槃力不相接
失足墮地悶絕無覺良久乃蘇以勇猛力自

責其心曠大劫來我爲身累循環六趣備繫
萬苦未嘗爲福利及有情今正是時何懈怠
耶爾時大王作是念已自強起立置身盤上
心生喜足得未曾有是時大地六種震動諸
天宮殿皆悉傾搖色界諸天住空稱讚見此
菩薩難行苦行各各悲感淚下如雨復雨天
華而伸供養時天帝等復還本形住立王前
作如是說王修苦行功德難量爲希輪王釋
梵之位於三界中欲何所作王即答曰我所
願者不須世間尊榮之報以此善根誓求佛

道天帝復言王今此身痛徹骨髓寧有悔不
王曰弗也我觀汝身甚大艱苦自云無悔以
何表明王乃誓曰我從舉心迄至于此無有
少悔如毛髮許若我所求決定成佛真實不
虛得如願者令吾肢體即當平復作此誓已
頃得如故諸天世人讚言希有歡喜踊躍不
能自勝佛告大衆往昔之時尸毗王者豈異
人乎我身是也時彼衆會聞是語已異口同
音咸伸勸請昔者世尊救度衆生不惜軀命
為求大法法海已滿法幢已建法鼓已擊法

炬已然機熟緣和正得其所云何捨離一切
衆生欲入涅槃而不說法時梵天王稱讚如
來為求法故嘗捨千頭佛受請已即時往趣
波羅奈國鹿野苑中三轉法輪同觀四諦三
寶於是出現世間

如來分衛緣起第三

爾時世尊在摩竭國竹林精舍重閣講堂與
阿難陀著衣持鉢入城乞食見有衰老夫婦
二人兩目失明加復貧悴唯有一子年始七
歲常出乞丐以贍其親或得新好果蔬飲食

先奉父母有得硬澀殘觸之物而自食之是時阿難念此小兒雖在幼年而行篤孝勤意朝夕不失所須佛分衛訖還歸精舍食畢洗足敷座而坐爲諸大衆將演經法阿難又手前白佛言適侍世尊入城分衛見一小兒將盲父母往來求乞承順孝養日以爲常甚爲難得佛言阿難匪惟在家及出家者皆以孝行而爲其先計其功德不可稱量所以者何憶念過去無量劫時我爲童子亦年七歲以孝順心曾割身肉以濟父母危急之命從是

以來承此功德常爲天帝及作人王直至成佛皆因此福阿難白佛願聞往因活親之命其事云何佛言阿難汝當諦聽吾今爲汝分別說之乃往古世此閻浮提有一大國名得又尸羅時彼國王名曰提婆有十太子各領一國其最小者名曰善住國界康樂人民熾盛時彼鄰境有一惡王名曰羅睺欲來侵掠搆其兇黨舉師相攻時善住王兵力不如乃奔父國避其禍難王有愛子其名善生方在髻鬘不忍棄遺將婦抱兒忽遽出境一路七

日得至家邦一路荒僻經十四程勉力而負
七日之儲登途悵惶悞涉迂道方行半路已
絕餼糧累日飢羸相顧殆盡王作是念事迫
計窮須棄一人可存二命乃諭夫人攜兒前
進引刃於後欲斫婦身用活幼兒兼以自濟
善生迴顧見父舉刀急白王言勿殺於母寧
割我肉以充其糧未聞有兒食於母肉勤誠
泣諫母命獲全是時善生乃白王言願將身
肉以救二親若割肉時勿令頓盡漸可取食
得延數程若命絕者肉當臭爛必為所棄於

事無成是時父母謂善生曰今為罪行非予
本心何忍舉刀親割汝肉於是王子先持利
刀自割身肉跪而奉之王與夫人見是事已
悲啼懊惱久乃能食經于數朝身肉都盡未
至他國饑急難堪於骨節間復得少肉齎之
前途用接餘命時善住王及彼夫人各以善
言慰喻其子聚首哀戀捨之遂行爾時王子
而作是念我以身肉濟活親命願達鄉國身
安泰然以此善根速獲菩提濟度十方一切
群品使離眾苦證真常樂發是願時三千世

界六種震動欲色諸天悉皆驚愕即以天眼觀於世間乃見菩薩修是孝行是諸天子於虛空中合掌稱讚淚墮如雨時天帝釋化作虎狼試驗菩薩欲來吞噉王子自念此諸猛獸今來食我唯有餘骨悉皆施之以歡喜心不生悔惱是時帝釋還復本形讚王子言甚為希有能以身肉濟活二親如是孝心無能及也汝須何願今當說之我唯志求無上佛道天帝復言我今視汝身肉都盡疲苦難堪得無悔恨於父母耶王子答言若我誠實心

無悔恨決定當來得成佛者使我身肉倏然如故作是誓已即得平復時天帝釋及諸天人同聲讚言善哉善哉佛告阿難往昔之時善住王者豈異人乎今淨飯父王是王夫人者今摩耶夫人是昔善生王子者則我身是也

菩薩本生鬘論卷第一